

**Protocol no. 26**  
**Sezzüda da marcurdi, 18 lügl 2012 – 20.15 – 23.50**

**Preschaints:** Albert Mayer, Andri Poo, Men Caviezel, Dumeng Jann,  
Marianne Werro-Lehmann e Claudia Luppi (protocol)

**Protocol**

Il protocol no. 25 da la sezzüda da mardi, 10 lügl 2012 vain approvà.

**195 021 FABRICA**  
**Jon Carl Rauch – Rimplazzamaint fanestras ed isolaziun**  
**veranda, Crusch**

Il patrun da fabrica ha l'intenziun da rimplazzar las fanestras da sia chasa cun fanestras chi han üna megltra valur d'isolaziun. L'aspet da las fanestras resta glistess, q.v.d. glistess bleras lastras cun glistess bleras trapartidas. Implü gniss eir isolada la veranda. L'aspet da la veranda restess eir il medem. I's tratta da lavurs da mantegnimaint. La dumonda po perquai gnir trattada in procedura d'annunzcha sainza publicaziun. Il Cussagl cumünal decida da conceder il permiss tenor ils plans inoltrats.

La taxa da trattamaint importa fr. 50.--.

**196 021 FABRICA**  
**Carlos Gross, Pensiun Aldier – Müdamaints vi dals cuntuoorns,**  
**Plaz 154**

Il patrun da fabrica vulesch far tscherchs müdamaints vi da l'üert da la Pensiun Aldier per pudair trar a nüz plü bain la surfatscha per metter maisas. Uschè as rivess in avegnir sün ün vial in fuorma da L e na plü davent dal mür d'entrada diagonal vers l'entrada da l'hotel. Previs esa da laschar sboudà ün pilaster dal mür d'entrada, da far pro l'entrada ün toc salaschada, da far lung il mür rabattas cun frus-chers e da renovar la spizzata tanter ils pilasters dal mür intuorn l'üert. Il Cussagl cumünal decida da conceder il permiss tenor ils plans inoltrats.

Il permiss da fabrica vain manzunà ch'a regard ils frus-chers saja da tgnair aint la ledscha tenor art. 96 EGzZGB (BR 210.100) (indicaziuns da l'uffizi forestal dal chantun Grischun).

La taxa da trattamaint importa fr. 50.--.

**197 012.318.02 Proget fusiuns**  
**Repassada dal plan d'investiziuns 2012-2017**

La grupp da proget „finanzas, statistica da finanzas, planisaziun da finanzas” dal proget da fusiun ramassa ils plans d'investiziuns dals cumüns interessats vi da la fusiun per survgnir üna survista che investiziuns chi füssan in quists tschinch cumüns planisadas i'ls prosems ons. L'anterior Cussagl cumünal vaiva elavurà insembel cun sar Marcel Franziscus da la Lischana fiduziari ün plan da finanzas 2012 – 2017 chi cumpiglia eir il plan d'investiziuns per quels ons. Il Cussagl cumünal repassa il plan d'investiziuns existent e til actualisescha tenor il stadi d'hoz per pudair surdar cifras actualas a la grupp da proget.

198 151

## **TIR DA SCHAIBGIAS PARNARSURA**

### **Dumondas per üna adattamaint dal reglamaint da tir a schaubgia Parnarsura**

La suprastanza da la società Tardanna fa, as basond sülla decisiun da lur radunanza da prümavaira, la dumonda da pudair müdar il reglamaint da tir da schaubgias da Parnarsura da maniera cha'l implant pudess gnir dovrà d'ürant las duos eivnas avant la chatscha ses dis l'eivna invezza da be duos dis sco fixà i'l reglamaint. Implü ha inoltrà ün ulteriur chatschader la dumonda da pudair ütilisar l'implant da tir ün eivna plü bod la prümavaira co fixà i'l reglamaint. Il Cussagl constatta cha'l reglamaint es entrà in vigur be güst als 15 november 2011, davò chi's vaiva chattà tantüna eir üna soluziun cuntantaivla culs abitants da Sur En pervi da las emissiuns da canera. Il Cussagl es da l'avis chi saja il prüm da provar co cha'l andamaint cul reglamaint nouv funcziuna e cha'ls commembers da la società Tardanna stuvevan il prüm far ün o duos ons experienza culs uraris d'adöver dal tir da schaubgias, per pudair muossar sü ün bsögn effectiv per ün schlargiamaint dals uraris avant la chatscha o la prümavaira, q.v.d. ils müdamaints stuvevan esser ün bsögn per üna gronda majorità dals commembers da la società Tardanna. Implü salüdess il Cussagl cumünal eir scha las dumondas pudessan gnir ramassadas ed inoltradas in möd cumünaivel. Il Cussagl cumünal decida da nu vulair aderir per intant a las dumondas fattas e da comunicar la posiziun dal Cussagl per charta als petents.

199 02

## **ADMINISTRAZIUN**

### **Broschüra ed aperitiv da bivgnaint**

La cusgliera Marianne Werro orientescha cha nossa giarsuna da commezi Leta Stricker haja s-chaffi d'ürant sia scolaziun illa partiziun actuariat üna boschüra chi cuntegna tuot las infuormaziuns necessarias sur dal cumün da Sent per abitants chi rivan nouv in nos cumün. Blers cumüns han implü eir amo l'üsanza d'invidar üna jada l'on ils abitants novs ad ün aperitiv. Nossa cusgliera fa perquai la proposta da bivgnantar eir a Sent ils abitants novs in quist möd amiaivel e simpatic. Il Cussagl cumünal decida da far bun la broschüra, da fixar üna jada l'on ün termin per l'aperitiv da bivgnaint e d'invidar cun charta ils abitants novs per l'aperitiv.

200 012

## **EXECUTIVA**

### **CCC – Acconsentimaint proposta per ulteriuras donaziuns**

Pro la CCC sun entradas davo la radunanza dals delegats amo differentas dumondas per sustegns finanzials. Per cha'ls petents nun hajan da spettar fin pro la prosma radunanza ordinaria vegnan talas dumondas decisas sün via circulara. La giunta giavüscha da tour cogniziun da la tabella cullas propostas per ün sustegn e da dar cuntschaint eventualas posiziuns chi vegnan missas in dumonda. Posiziuns chi vegnan contestadas vegnan suottamissas a la prosma radunanza da delegats. La giunta giavüscha als Cussagls cumünals da dar cuntschaint schi sun d'accords cullas propostas da la giunta. Il Cussagl cumünal decida da dar l'acconsentimaint per las donaziuns propuonüdas.

201

## **ORIENTAZIUNS**

### **Surveglianza sendas**

Per la signalisaziun da las sendas es daspö blers ons incumbenzà Armon Nuotclà, ma el nun ha l'incumbenza da controllar regularmaing eir amo il stadi da las sendas. Il schef da planisaziun propuona perquai da dar ad üna persuna chi ha peida (evt. pensiunà) e chi passainta jent temp sülla rait da sendas da Sent l'incumbenza da controllar regularmaing il stadi da las sendas e da far eventualmaing eir güst plü pitschnas lavurs per metter ad ir las sendas. Il Cussagl cumünal salüda quist idea e giavüscha cha'l schef da planisaziun o eir la scheffa da turissem s'occupan inavant dal tema e piglian sü contact cun personas chi gnissan in dumonda per quist intent.

### Innaiver

Il capo orietnescha chi haja lö als 9 avuost ün'ulteriura sezzüda ed üna visita occulara a regard il proget d'innaiver ch'id es per intant amo bloccà causa chi vain pretais amo tschertas masüras e cunvegnas davart da l'uffizi per natüra ed ambiaint e davart la Pro Natura.

### Finanziaziun progets regiunals

Tenor la cumischiun da finanzas da la PEB as tira in consideraziun da finanziair ils progets chi vegnan valütats sco progets regiunals cun raps our dals fits d'aua. Previs es 1 rp./kwh. Il capo orientescha chi varà lö in november üna radunanza per fixar quist import.

### Promoziun turistica – Visita occulara a Sent

L'Uffizi per economia e turissem es vi da l'elavuraziun d'ün manual chi dess dar tscherts impuls a las regiuns turisticas per dvantar plü attractivas sül marchà da turissem. Hozindi nu vuol il giast be vacanzas per as remetter o per müdar ambiaint dimpersè el es in tschercha d'evenimaints. Nossa regiun es gnüda tschernüda sco regiun da pilot in connex cul manual e duos cumüns han pudü profitar d'üna visita occulara da sar Roland Scheurer, cusgliader pel turissem da Berna, chi ha pudü far attent sün puncts critics ed eir puncts positivs in nos cumüns.

Per l'actuar: